



2^{DA} SESSIONE URDINARIA DI U 2024
RIUNIONE DI I 28 È 29 DI NUVEMBRE DI U 2024

2^{ÈME} SESSION ORDINAIRE DE 2024
RÉUNION DES 28 ET 29 NOVEMBRE 2024

N° 2024/O2/061

**Question orale déposée par Mme Marie-Claude BRANCA
au nom du groupe « CORE IN FRONTE »**

OBJET : I NOSCI ANZIANI A NOSCIA PRIMURA.

Sgiò Pridenti, Madama a cunsigliera esecutiva in carica di a saluta.

Più d'un annu fà, ci semu tutti mubilizzati pà mantena a maternità di Portivechju chì risicava di sarrà. Tandù aviamu tutti dittu chì ùn si pudia metta in priculu a vita di i donni è i ziteddi. Incù a mubilizzazioni semu riisciuti à fà cambià a decisionii di l'ARS è di u Statu è à mantena un arnese indispinsevuli pà a saluta di l'aghjenti di stu rughjonu.

Da poi à qualchi mesi monda famiddi di u rughjonu di Portivechju Bonifaziu si lagnani chì so anziani so missi in priculu da a cattiva gistioni di l'urgenzi è da a mancanza di camari pà ricevali. Monda malati so stati rinviati in casa. Certi esami nicissari ùn sò micca stati fatti. Iss'esamini è una presa in carica seria avariani pussutu impidiscia a morti di certi malati.

Ùn si tratta micca di suppusizioni senza fundamenti ma d'elementi precisi è di cartulari serii chì no pudemu prisintà.

A priurità hè stata data à altri sirvizia è cusì mancani i piazzu pà l'anziani chì so rinviati in casa. Ùn si pò ghjucà incù a so vita almenu di pinsà chì passata una certà ùn ci hè più bisognu di curà l'aghjenti. Par no tutti i viti contani hè par quissa chì à parè nosciu si devi rifletta à una vera ristrutturazioni di l'urgenzi è di u SAMU è à un veru sirviziù pà i parsoni anziani.

Sta situazione veni in parti da a scelta di i pulitichi è di l'ARS d'avè appughjatu a ripresa di a clinica incù un parsunali medicali privatu ch'è t'ha difficoltà à occupà si di i malati à l'urgenzi, piuttosto che di rifletta à un ufferta pubblica.

A noscia Cullitività ùn ha nisciun puteri in materia di saluta ma pudemu metta l'ARS è i propriitari di a clinica di Portivechju dananzi à i so rispunsabilità. Pudemu purtà li à rifletta à a nicissità di crià una struttura pubblica forti gistita da un parsunali medicu di u sittori publicu incù una parti di i sirvizia versu Bonifaziu lachendu altri sirvizi à a clinica di Portivechju mittindu in opara una cullaborazioni tra sti dui strutture.

Pà u rispettu di a saluta di tutti, vechji o anziani, ùn ci pudemu accuntità di custatà a situazione è cuntinuà à mandà i nosci cunduglianzi à i famiddi.

Sgiò Prisidenti, Madama a cunsigliera esecutiva seti pronti à metta in andà una discussioni tra l'ARS, i propriitari di a clinica di Portivechju è à noscia Cullitività par dà à l'aghjenti di u nosciu rughjonu a pussibilità di pudé curà si è pudé campà comu à meritanu ?

Vi ringraziu.